

Areglo temporal di e Sekretario di Estado di Asuntunan Interno i Relashon den Reino tokante supsidio inisiativa sosial pasado di sklabbitut transatlántiko pa e parti Karibense di e Reino

E Sekretario di Estado di Asuntunan Interno i Relashon den Reino i e Minister di Asuntunan Interno i Relashon den Reino;

Aktuando di un akuerdo ku Promé Minister, Minister di Asuntunan General, Minister di Enseñansa, Kultura i Siensia, Minister di Asuntunan Sosial i Empleo, Minister di Asuntunan di Eksterior, Minister di Finansa, Minister pa Protekshon Hurídiko i Sekretario di Estado di Salubridat, Bienestar i Deporte;

Konsiderando e artíkulonon 2, insiso dos, 3, insiso un i dos, i 4, insiso un i dos, di e Kaderwet overige BZK-subsidies (Lei marko sobrá supsidio BZK) i e artíkulonon 6, insiso shete, 8, insiso un i dos, 10, 11, insiso un, dos, i tres, 14, 20, 24, insiso sinku, di e Kaderbesluit BZK-subsidies (Dekreto marko supsidionon BZK);

Desishonnan:

Artíkulo 1. Definishonnan

Den e areglo aki ta komprondé bou di:

Partinan Karibense di e Reino: Kòrsou, Aruba, Sint Maarten, Boneiru, Sint Eustatius i Saba.

Komishon: e komishon menshoná den Artíkulo 11, insiso un;

Komunidad: Ta trata di desendientenan di hende sklabisá i e grupo di hende ku ken, a base di karakterístikanan i interesnan komun, nan tin un espíritu di solidaridat òf un laso interpersonal.

Organisashon grassroots: organisashon, instituto kultural òf instituto sosial sin fin di lukro (Fundashon òf sosiedat, ku a lanta na nivel lokal for di e komunidad di desendiente di hende sklabisá, i ta organisá pa atendé ku kuestionnan spesífiko relashoná ku e pasado di sklabbitut na favor di desendiente di hende sklabisá.

Minister: Minister di Asuntunan Interno i Relashon den Reino;

Desendiente di hende sklabisá: E generashonnan ku a nase di e generashonnan di hende afrikano, nativo for di e diferente partinan di Merka i Marron (desendiente di katibu ku a hui i a bai biba den interior komo tribu), ku for di mas o ménos 1528 te 1863/1873 tabata sklabisá.

Pasado di sklabbitut transatlántiko: E era históriko (respektivamente for di kuminsamentu di siglo 16 te fin di siglo 19) den kua a sequestrá, trafiká i sklabisá miónes di hende, prinsipalmente for di Afrika, ku despues a obligá pa traha riba plantashi, den mina i den otro sektor, prinsipalmente den e diferente partinan di Merka (Nortamérica i Suramérica), Afrika i partinan di Oropa.

Mankomunidad: un kolaborashon entre por lo ménos un òf mas isla/ pais den e partinan Karibense di e Reino.

Artíkulo 2. Meta di supsidio

E Minister por suministrá supsidio pa inisiativa na favor di desendiente di hende sklabisá den e parti Karibense di e Reino, ku siguiendo ehèmpel di e diskulpanan ofresé pa e pasado di sklabbitut kolonial tin un òf mas di e siguiente ophetivonan:

- a. mihó komprension tokante e impakto di e pasado di sklabbitut i kombate di e konsekuensianan di e impakto di e pasado di sklabbitut den presente;
- b. e prosesamentu di e pasado di sklabbitut;
- c. promoshon di konosementu i konsientisashon tokante e pasado di sklabbitut; òf
- d. rekonosementu i konmemorashon di e pasado di sklabbitut.

Artíkulo 3. Plafòn di supsidio

1. Den e periodo di promé di yùli 2024 te promé di yùli 2029, e Minister ta pone € 33.333.333,33 disponibel, un montante ku lo reparti den periodonan di solisitut ku e Minister lo stipulá, ku plafònnan di supsidio pa e periodonan i e partinan karibense di e Reino apart.
2. E posibilidat pa entrega di petishon pa supsidio ta eksistí solamente durante periodonan di solisitut stipulá dor di e Minister.

Artíkulo 4. Periodonan di solisitut

1. E promé periodo di solisitut ta kore di promé di yùli 2024 te promé di sèptèmber 2024 i ta destiná pa solisitutnan manera mensioná den Artíkulo 5. Den e periodo aki ta konta:
 - a. e plafòn di supsidio pa solisitut na Kòrsou ta €555.555,55
 - b. e plafòn di supsidio pa solisitut na Aruba ta €555.555,55
 - c. e plafòn di supsidio pa solisitut na Sint Maarten ta €555.555,55
 - d. e plafòn di supsidio pa solisitut na Boneiru ta €555.555,55
 - e. e plafòn di supsidio pa solisitut na Saba ta €555.555,55
 - f. e plafòn di supsidio pa solisitut na Sint Eustatius ta €555.555,55
2. E di dos periodo di solisitut ta kore di promé di òktober 2024 te promé di aprel 2025 i ta destiná pa solisitutnan manera mensioná den Artíkulo 5. Den e periodo aki ta konta:
 - a. e plafòn di supsidio pa solisitut na Kòrsou ta €555.555,55
 - b. e plafòn di supsidio pa solisitut na Aruba ta €555.555,55
 - c. e plafòn di supsidio pa solisitut na Sint Maarten €555.555,55
 - d. e plafòn di supsidio pa solisitut na Boneiru ta €555.555,55
 - e. e plafòn di supsidio pa solisitut na Saba ta €555.555,55
 - f. e plafòn di supsidio pa solisitut na Sint Eustatius ta €555.555,55
3. E di tres periodo di solisitut ta kore di promé di mei 2025 te promé di sèptèmber 2025 i ta destiná pa solisitutnan manera mensioná den Artíkulo 5. Den e periodo aki ta konta:
 - a. e plafòn di supsidio pa solisitut na Kòrsou ta €555.555,55
 - b. e plafòn di supsidio pa solisitut na Aruba ta €555.555,55
 - c. e plafòn di supsidio pa solisitut na Sint Maarten €555.555,55
 - d. e plafòn di supsidio pa solisitut na Boneiru ta €555.555,55
 - e. e plafòn di supsidio pa solisitut na Saba ta €555.555,55
 - f. e plafòn di supsidio pa solisitut na Sint Eustatius ta €555.555,55
4. Si no utilisá e plafònnan di supsidio for di e promé periodo kompletamente, e Minister por utilisá e sobrá rekursonan pa solisitutnan den e di dos periodo di solisitut.
5. Si no utilisá e plafònnan di supsidio for di e di dos periodo kompletamente, e Minister por utilisá e sobrá rekursonan pa solisitutnan den e di tres periodo di solisitut.
6. Despues di e di tres periodo di solisitut, ainda ta sigui por lo ménos sinku periodo di solisitut. Den e Staatscourant (boletin di legishon nashonal di Hulanda) i den e Staatsbladen (boletinnan di legishon nashonal), e Minister ta publiká partisipashon tokante stipulashon di e periodonan di solisitut, hasiendo mension di e destinashon i e plafòn di supsidio pa e periodo di solisitut en kestion.

Artíkulo 5. Aktivitatnan eligibel pa supsidio

1. E Minister ta asigná supsidio pa aktivitatnan pa profeshonalisashon di organisashon den e partinan karibense di e Reino ku ta traha na fabor di e metanan ku a mensioná den Artíkulo 2.
2. E Minister ta asigná supsidio pa iniciativa sosial den e partinan karibense di e Reino ku ta enfoká riba fortalecimento di komunidat i/òf tin un impakto riba e metanan ku a mensioná den Artíkulo 2.

Artíkulo 6. Solisitantenan

1. E solisitantenan no ta gobièrnu. Pues no ta asigná supsidio na e gobièrnunan di Kòrsou, Aruba i Sint Maarten òf e Kolegianan Ehekutivo di Boneiru, Saba òf Sint Eustatius.
2. Pa supsidio ta bini na remarke partidonan privá i personanan natural registrá na e partinan karibense di e Reino.
3. No ta asigná solisitut pa supsidio, a base di Artíkulo 5, insiso dos, na persona natural.

Artíkulo 7. Mankomunidat

1. Organisashonnan di e diferente islanan por ta parti di un mankomunidat.
2. Lo establese e kolaborashon den un akuerdo di kooperashon, firmá dor di tur partido di e mankomunidat den lokual lo nombra un solisitante prinsipal, ku lo outorisá pa representá e mankomunidat den i pafó di korte.
3. E lokalidat di e solisitante prinsipal ta determiná kua plafòn di supsidio ta konta pa e solisitut.
4. E Minister lo hasi un modelo disponibel di forma elektròniko pa e akuerdo di kooperashon mensioná den insiso dos. Esaki ta disponibel na papiamentu, papiamento, ingles i hulandes.

Artíkulo 8. Altura di supsidio

1. E supsidio a base di Artíkulo 5, insiso un, ta un voucher di €10.000,-
2. E supsidio a base di Artíkulo 5, insiso dos, ta 100% di e gastunan eligibel pa supsidio ku un mínimo di €10.000,- i un máksimo di €500.000,-

Artíkulo 9. Solisitut pa supsidio

1. Lo presentá e solisitut hasiendo uso di un formulario ku e Minister a hasi disponibel di forma elektròniko. E formulario ta disponibel na ingles, papiamentu, papiamento i hulandes.
2. Un solisitut a base di Artíkulo 5, insiso dos, fuera di e datonan i dokumentonan mensioná den Artíkulo 11, insiso tres, di e Kaderbesluit BZK-subsidies (Desishon marko supsidionan BZK) ta kontené por lo ménos (c.q. e kriterionan mínimo pa solisitut di supsidio ta supervisá):
 - a. un bista general di e aktividatnan pa lokual ta pidi e supsidio, ku un deskripsjon di e partidonan ku ta involví ku esaki i e gastunan ku e aktividatnan aki ta trese
 - b. un planifikashon di tempu di e aktividat ku e fecha di inisio i e fecha sperá di finalisashon di e plan di aktividat;
 - c. e number di kuenta bankario unda mester depositá e montante di supsidio, inkluso un estado di kuenta bankario ku nòmber di e solisitante prinsipal i number di e kuenta bankario.
3. Ta posibel pa e solisitante prinsipal kaba di yena e solisitut di supsidio inkompleto denter di 2 siman despues di e anunsio di e Minister ku e solisitut ta inkompleto.

Artíkulo 10. E sekuensia di e solisitutnan

1. E Minister ta evaluá tur solisitut kompleto entregá den un periodo di solisitut, i ta establese un sekuensia di solisitut a base di e kriterionan di evaluashon inkluí den Artíkulo 12.
2. E sekuensia di solisitut a base di Artíkulo 5 insiso un, i solisitut mas abou ku €25.000 a base di Artíkulo 5, insiso dos, ta tuma lugá pa medio di sorteo ora surpasá e plafòn di supsidio.
3. E sekuensia di solisitut a base di Artíkulo 5, insiso dos, di €25.000,- te un máksimo di €500.000,- ta tuma lugá basá riba te kon leu e solisitut ta sirbi e ophetivonan mensioná den

Artíkulo 2, teniendo kuenta ku un konseho di e Komishon di konseho.

Artíkulo 11. Komishon di konseho

1. Tin un Komishon ku ta konsehá e Minister tokante aplikashon di Artíkulo 10, insiso tres, a base di un evaluashon basá riba e kriterionan di evaluashon manera inkluí den Artíkulo 12.
2. Denter di 4 siman despues ku sera e periodo di solisitut, e Komishon ta saka un konseho por eskrito pa Minister.
3. E Minister ta tuma un desishon tokante e solisitut teniendo kuenta ku e konseho di e Komishon di konseho.

Artíkulo 12. Kriterionan di evaluashon

Kalidat di un solisitut pa supsidio a base di Artíkulo 5, insiso dos, di €25.000,- euro i un máksimo di €500.000,- lo establese a base di e siguiente kriterionan di evaluashon, enumerá den órden di nan importansia relativo:

- a. E grado te kon leu un aktividat ta duna un kontribushon na e ophetivonan menshoná den Artíkulo 2, insiso un.
- b. E kantidat di persona ku direktamente òf indirektamente lo alkansá ku e proyekto.
- c. E grado te kon leu e proyekto ta benefisiá desendiente di hende sklabisá.
- d. E faktibilidat di e aktividatnan.
- e. E alkanse di e aktividat relatá na e gastunan relashoná kuné.
- f. E grado te kon leu ta buska kolaborashon i konekshon ku organisashon grassroots.

Artíkulo 13. Motibunan pa nenga

E Minister ta nenga un solisitut pa supsidio ora i te asina leu ku:

- a. Proyektonan ta den konflikto ku lei i regulashon hulandes;
- b. Supsidionan no ta benefisiá e ophetivonan menshoná den Artíkulo 2, direktamente ni indirektamente.
- c. E montante di e supsidio ku a solisitá ku su asignashon den e sekuensia ta eksedé e plafòn di supsidio stipulá den Artíkulo 4.
- d. Proyektonan ku un plaso di mas ku 6 aña;
- e. E solisitut tin di haber ku e gastunan ku mester fuera di e solisitut inisial pa realisá un inisiativa;
- f. Proyektonan ku a supsidiá kaba a base di e areglo aki;
- g. Si esaki ta aplikabel, ora falta un akuerdo di kooperashon.

Artíkulo 14. Forma di suministro di supsidio

1. Ora asigná un supsidio a base di Artíkulo 5, insiso un, di e areglo aki, mesora ta duna un disposishon pa stipulashon di supsidio.
2. Ora asigná un supsidio di €10.000,- te €25.000,- a base di Artíkulo 5, insiso dos, lo duna un disposishon pa asigná supsidio hasiendo menshon di e fecha mas tardá ku mester a hasi e aktividatnan i e fecha mas tardá ku lo stipulá e supsidio ofisialmente.
3. Ora asigná un supsidio di €25.000,- te ku €500.000,- a base di Artíkulo 5, insiso dos, lo suministrá e supsidio den forma di un montante fiho a base di e datonan ku ta entregá huntu ku e solisitut. Ta duna un disposishon pa suministro di supsidio ku menshon di e fecha riba lokual pa mas tardá mester a ehekutá e aktividatnan, i e tempu ku mester hasi un solisitut pa un disposishon pa determinashon di supsidio.
4. Pa supsidio no ta bini na remarke
 - a. Gastunan di eksplotashon;
 - b. Gastunan ku tin e karakter di un herstelbetaling (pago finansiero en konekshon ku daño okashoná pa sklabitut), kompensashon òf indemnishon;
 - c. Gastunan pro memoria (ku no a fiha ainda);

- d. Gastunan imprevisto.

Artíkulo 15. Obligashonnan resibidó di supsidio

Fuera di e obligashonnan menshoná den e Kaderbesluit BZK-subsidies (Desishon marko supsidionan BZK), e risibidó di e supsidio tin e obligashon pa pèkurá ku:

- a. Lo aspirá e ophetivonan stipulá den e solisitut di un manera eficiente;
- b. E atministrashon ta hibá di un manera kla i eficiente i e atministrashon ta duna un bista korekto, kompleto i aktualisá di posishon finansiero di e solisitante prinsipal i di entradanan i gastunan relashoná ku e aktividat supsidiá.

Artíkulo 16. Entrada na vigor

1. E areglo aki ta drenta na vigor entrante e dia despues di fecha di e Staatscourant (boletin di legislashon nashonal di Hulanda) den kua ta pone esaki i ta kaduká entrante promé di yüli 2029, 00:00 or di ora hulandes oropeo.
2. Kontrali na insiso dos di e areglo aki, manera e ta riba 30 di yüni 2029, ta sigui aplikabel riba despacho di solisitut i determinashon di supsidio a base di e areglo aki.

Lo pone e areglo aki huntu ku e splikashon den Staatscourant (boletin di legislashon nashonal di Hulanda) i den e Staatsbladen (boletinnan di legislashon nashonal) di Aruba, Kòrsou i Sint Maarten.

Sekretario di Estado di Asuntunan Interno i Relashon den Reino

Splikashon

I. Parti general

1. Motibu i trasfondo

Dia 19 di desèmber 2022, na nòmber di gobièrnu Promé Minister a pidi diskulpa pa e aktuashon hulandes den pasado relashoná ku e pasado di sklabbitut. E trasfondo di e diskulpanan aki tabata e rapòrt di investigashon presentá na yüli 2021, 'Kadenanan di pasado'¹ di e Grupo di Diálogo Pasado di Sklabbitut. Den e rapòrt, e grupo di diálogo a enfoká riba e impakto di e pasado di sklabbitut transatlántiko den e sosiedat di awe, i e investigashon tabata enfoká riba rekonosé i inkorporá e pasado komun aki mas ampliamente. Paralelo na e diskulpanan, den e reakshon di gabinete riba e rapòrt (i su aneksonan ku aporte insular spesífiko)² a hasi algun promesa pa elaborashon di e konsehonan pa realisá desaroyo di futuro maneho enfoká riba rekonosementu, prosesamentu i rekuperashon sosial. Den e reakshon di gabinete aki, e gabinete a anunsiá un areglo di supsidio pa inisiativa sosial dirigí riba:

- Konosementu i konsientisashon tokante e pasado di sklabbitut transatlántiko;
- Rekonosementu i konmemorashon;
- Mihó kompreshon tokante e impakto di e pasado di sklabbitut i prosesamentu di esei.

Pa e areglo di supsidio aki a reservá un montante di un biaha so di €100 mion euro. E alkanse di e fondo ku e areglo di supsidio inisiativa sosial ta parti di dje ta e Pasado di sklabbitut transatlántiko; den e kaso aki, pa partidonan privá i personanan natural for di henter e Reino Hulandes i pa Sürnam³. Ademas, e gabinete tabata ke logra un balansa geográfiko den gastamentu di e rekursionan, ku lokual lo tene kuenta ku e diferensianan di ritmo, aserkamentu i organisashon, i ku lo hasi hustisia na e nesidatnan spesífiko for di diferente komunidad.

Den e cuadro aki, den e grupo di guia ministerial di 29 di sèptèmber 2023 a disidí di splés e €100 mion disponibel pa e areglo inisiativa sosial den tres parti: €33 mion pa respektivamente Hulanda (Oropeo), e parti karibense di e Reino, i Sürnam⁴. E aserkamentu aki ta ofresé e posibilidat di trabou na midí pa kada área geográfiko, unda pa kada área apart lo desaroyá un areglo adekuá, ku respèt pa e manera, prosesonan, i ritmonan di traha lokal. E areglo aneksá ta tokante e areglo inisiativa sosial pasado di sklabbitut transatlántiko di e parti karibense di e Reino Hulandes.

2. Linianan prinsipal di e areglo aki

Puntonan di salida

E puntonan di salida pa e areglo di supsidio pa e partinan karibense di e Reino a surgi for di e rapòrt 'Ketenen van het verleden' (Kadenanan di Pasado) – i partikularmente su aneksonan ku kontribushonnan for di e islanan - e reakshon di gabinete di 19 di desèmber 2022 riba e rapòrt di e Grupo di diálogo Pasado di Sklabbitut i e karta di progreso di 23 di yüni 2023 'Brief vervolgtraject excuses sklavernijverleden' (Karta trayekto kontinuashon diskulpanan pasado di sklabbitut). Tambe tabatin diferente kombersashonnan intensivo i konstruktivo ku e komunidadnan, representantenan, i gobièrnunan di e islanan/ paisnan den e partinan karibense di e Reino durante 2022 i 2023 pa haña input, manera tambe un Catshuissessie karibense na òktober 2023. Den e areglo aki tambe ta tene kuenta ku e *CARICOM Ten Point Plan for Reparatory Justice (Plan di Dies Punto di CARICOM pa Rekuperashon di Hustisia)*.⁵

¹ <https://open.overheid.nl/documenten/ronl-27c6068b-1705-49b1-b125-643b8905fd13/pdf>

² Tweede Kamer, aña di reunion 2022-2023, 36 284, nr. 1 <https://open.overheid.nl/documenten/ronl-a6b18a9d980649083437fdc086c48125c608be46/pdf>

³ Tweede Kamer, aña di reunion 2022-2023, 36 284, nr. 34 <https://open.overheid.nl/documenten/47c0453d-233e-42ce-99e2-b5badd641785/file>

⁴ [Slavernijverleden | Tweede Kamer der Staten-Generaal](#), nr. 36284-36.

⁵ CARICOM TEN POINT PLAN FOR REPARATORY JUSTICE (PLAN DI DIES PUNTO DI CARICOM PA REKUPERASHON DI HUSTISIA) [CARICOM Ten-Point Plan for Reparatory Justice.pdf \(ohchr.org\)](#)

Ophetivonan

Esnan ku ta bini na remarke pa supsidio ta inisiativanan sosial ku ta kontribuí di un manera supstansial na por lo ménos un di e ophetivonan mensioná den e reashon di gabinete di 19 di desèmber 2023:

- Mihó kompreshon tokante e impakto di e pasado di sklabilitut i kombate di e konsekuensianan di e impakto di e pasado di sklabilitut den presente;
- Prosesamentu di e pasado di sklabilitut, riba tereno sosial i personal;
- Promové konosementu i konsientisashon tokante e pasado di sklabilitut; òf
- Rekonosementu i konmemorashon di e pasado di sklabilitut.

Atenshon spesial pa promoshon di organisashon grassroots

Den kuadro di e areglo proponé pa inisiativa sosial, nos ta hasi esfuerso pa krea un klima inklusivo i ku ta sostené pa diferente komunidad lokal den e partinan karibense di e Reino. Tin un enfoke spesífiko riba promoshon di profeshonalisashon di i proyektonan serka organisashon grassroots, ku hopi biaha ta forma e núklo di inisiativa lokal outéntiko. E organisashonnan aki, salí for di e base di e komunidadnan di desendiente di hende sklabisá, ta operá den e konteksto di e parti karibense di e Reino ku tiki kapasidat i un skarsedat di fondo pa sigui desaroyá nan mes i profeshonalisá mas aleu. Dor di ofresé apoyo dirigí riba e inisiativanan grassroots aki, ku e areglo aki no solamente ta aspirá pa realisá kambio duradero, sino tambe pa fortalecé e elastisidat i envolvimentu den e komunidadnan.

Den e areglo a inkluí dos inisiativa pa promoshon di organisashon grassroots:

1. Un voucher ku organisashon grassroots por usa pa profeshonalisashon i fortalesimentu di nan organisashon te un máksimo di €10.000.
2. Organisashon mas grandi establecé ku ta traha huntu ku organisashon grassroots pa nan inisiativa òf ku ta inkluí organisashon grassroots den nan proyekto ta haña un rango mas haltu den e asignashon di supsidio. Esaki tambe ta konta pa solisitut entregá dor di mas ku un isla pa proyektonan ku ta surpasá isla.

Repartishon di supsidio

E supsidio ta repartí den tres parti:

1. Un supsidio pa profeshonalisashon di organisashon grassroots;
2. Un supsidio pa inisiativa pa fortalecé komunidad;
3. Un supsidio pa inisiativa ku impakto supstansial.

Den esaki, pa loke ta e supsidio pa inisiativa pa fortalecé komunidad i e supsidio pa inisiativa ku impakto supstansial ta posibel pa un organisashon entregá un solisitut pa vários diferente proyekto pa kada periodo í ku ta ehersé un proyekto individual durante mas aña, ku un máksimo di sinku aña. Tambe, e punto di salida serka kada tipo di solisitut di supsidio ta ku por hasi esaki den tur e idiomaan ku ta papia na e islanan den e parti karibense di e Reino: ingles, papiamentu, papiamentu, i hulandes.

Parti 1 Profeshonalisashon di organisashon grassroots

E parti aki di e areglo ta ofresé organisashon grassroots di desendiente i komunidad envolví e posibilidat pa profeshonalisashon i fortalesimentu di nan organisashon mediante un voucher di profeshonalisashon di maksimalmente €10.000, ku lo asigná a base di un sorteo. Den e splikashon di artíkulo pa artíkulo, serka Artíkulo 10 lo sigui ilustrá e proseso aki mas aleu.

E propósito di e voucher aki ta pa diferente aktividatnan dirigí riba fortalesimentu di e kapasidat i sostenibilidat organisatorio di e organisashonnan. Aki lo pensa na e siguiente posibilidatnan, *ku no ta limitativo*:

- *Desaroyo di kapasidat*: Apoyo pa workshop i entrenamentu pa oumento di e abilidadnan i konosementu di miembronan di direktiva i empleadonan. Esaki tambe ta enserá apoyo ku lantamentu di struktura di maneho i maneho finansiero efektivu, i ta konta tambe pa lantamentu di un organisashon i e aktividatnan ku esei ta enserá, manera un inskripsjon serka Kámara di Komersio i redakshon di statuto.
- *Promoshon pa forma ret*: Posibilidatnan pa organisá i fortalecé mankomunidadnan, dor di lokual organisashonnan tin mihó konekshon ku partnernan relevante i ku otro.

- *Aksesu na Rekurso:* Pa optené konseho i informashon na midí tokante posibilidatnan eksistente pa supsidio i finansiamentu, i tambe apoyo pa skibi solisitut pa supsidio eksitoso.
- *Apoyo teknológiko:* Entrenamentu den uso di teknologia i instrumento moderno, ku e meta pa promové optimalisashon di digitalisashon den e organisashon.
- *Marketing i Visibilidat:* Desaroyo di strategianan efektivo di marketing i komunikashon pa oumentá visibilidat di e organisashon, di moda ku nan por oumentá nan impakto.
- *Konseho tokante Sostenibilidat:* Apoyo ku desaroyo di modelo di finansiamentu duradero pa término largu, dor di lokual lo promové kontinuidat i independensia di e organisashonnan.

E diversidat den e posibilidatnan di apoyo ta hasi organisashonnan kapas pa pone pasonan na midí den direkshon di un futuro fortalés i elástiko.

Parti 2 Inisiativa pa fortalésé komunidad

E parti aki di e areglo ta enserá inisiativa pa fortalésé komunidad (Community Resilience Initiatives), enfoká riba promoshon di elastisidat den e komunidadnan di desendiente di hende sklabisá i riba selebrashon di nan elastisidat den e partinan karibense di e Reino. Den e segmento aki di e areglo tin dos opshon di supsidio disponibel: un supsidio 'chikitu' di entre €10.000 i €25.000, asigná a base di sorteo, i un supsidio 'grandi' ku ta varia entre €25.000 i €125.000, kua e Komishon di konseho ta evaluá i na kua ta asigná un rango. Esnan ku a yega di risibí un voucher di profeshonalisashon kaba, for di e aña t+1 tambe por entregá un solisitut, si e ta kai den e kategorianan aki.

Entre otro, e inisiativanan aki por tin e siguiente ophetivonan *no limitativo*:

- *Koheshon Sosial i Formashon di Ret:* Organisashon di enkuentro i evento di komunidad ku tin sanashon i rekuperashon den diferente komunidad komo meta, den kua e énfasis ta riba tresementu huntu di miembronan di komunidad, promoshon di koheshon sosial, i prosesamentu sosial i personal di e impakto di e pasado di sklabilitut.
- *Edukashon i Konsientisashon:*
 - Desaroyo di programa ku ta enfoká riba oumento di konosementu tokante e propio pasado di sklabilitut i konsientisashon di su impakto riba patronchinan individual i sosial;
 - Inisiativa edukativo enfoká riba konsientisá, krea komprension, i empoderá;
 - Programa edukativo i informativo pa oumentá elastisidat di e komunidad kontra diskriminashon i rasismo, ku atenshon pa empoderá, informá, i apoyá den situashonnan di diskriminashon.
- *Proyektonan di Community (Komunidad):* Finansiamentu di proyektonan guiá dor di komunidadnan ku ta konsentrá riba kompartimentu di nan historia i eksperensianan relashoná ku sklabilitut, pero tambe konmemorashon di esaki.
- *Desaroyo Konhunto di Plannan/ Proyektonan ku Hopi Impakto:*
 - Empoderá e komunidad di forma ekonómiko;
 - Konsientisá, eduká i empoderá relashoná ku e impakto di e pasado di sklabilitut riba salú mental i físiko di desendientenan;
 - Formashon di ret profeshonal den komunidadnan;
 - Kampananan di informashon tokante salú;
 - Proyektonan pa promové bienestar den e komunidad, manera por ehèmpel deporte.
- *Programa Edukativo i Desaroyo di Material Edukativo tokante e Propio Pasado di Sklabilitut:* Desaroyo di programanan edukativo ekstenso pa komunidadnan, inkluso material di lès i workshop interaktivo. Bou di esaki tambe ta kai desaroyo di material di lès relevante, i tambe investigashon ku ta nesesario pa e material di lès aki.
- *Organisashon di Charla, Seminar i Diskushon den Panel di Índole Internashonal:* Fasilitashon di evento ku ta promové diálogo i komprension dor di charla, seminar, i diskushon den panel di índole internashonal.

- *Plataforma Digital*: Desaroyo di website, app, òf tur virtual ku ta ofresé informashon i material edukativo tokante e pasado di sklabbitut.

Parti 3 Inisiativa ku Impakto Supstansial

Parti 3 di e areglo ta enserá inisiativa ku un impakto supstansial, destiná pa proyekto grandi ku tin un impakto supstansial riba konosementu, konsientisashon, rekonosementu, konmemorashon, i aserkamentu di e impakto di e pasado di sklabbitut. Pa e kategoria aki por hasi solisitut ku ta kai den alkanse di €125.000 te €500.000. Un Komishon di konseho lo ehersé e evaluashon i asignashon di e sekuensia di e solisitut.

Di e proyektonan aki ta spera un impakto profundo i permanente riba e ophetivonan di e areglo, i ku ta kontribuí na un konsientisashon sosial i un transformashon mas amplio relashoná ku e pasado di sklabbitut. Ademas, lo hasi esfuerso pa promoshon di kolaborashon interinsular, i tambe kolaborashon entre organisashon mas grandi i organisashon grassroots.

Komishon di konseho

Den e proseso pa asignashon di montante di supsidio for di €25.000,- lo hasi uso di un Komishon independiente i di komposishon diversifiká pa evaluashon di solisitut pa i asignashon di e supsidionan, i ku ta konsehá tokante e kontenido i e sekuensia di e solisitut a base di e kriterionan di evaluashon ku a mensioná den Artíkulo 12. Di e manera aki ta garantisá ku no solamente e inisiativanan establese ku ta eksitoso den e proseso di solisitut di supsidio por tin chèns riba e rekursonan, sino ku e partidonan ku proyektonan ku impakto ku tin ménos eksperensia den solisitut di supsidio tambe tin aksesu na e medionan di e areglo aki. Lo kompartí e konseho di e Komishon tokante un solisitut por eskrito ku e Sekretario di Estado di Asuntunan Interno i Relashon den Reino. E Sekretario di Estado ta tuma e desishon final teniendo kuenta ku e konseho.

Den Reklutamentu di e miembronan di e Komishon di konseho lo konsiderá e siguiente profil:

- *Eksperensia ku Traha huntu ku Organisashon grassroots*: Miembronan di e Komishon di konseho mester tin eksperensia ku traha huntu ku/òf apoya di organisashon grassroots. Esaki ta enserá un kompreshon e retonan i oportunitatnan ku organisashonnan asina tin di haber kuné.
- *Konosementu di Inisiativa sosial*: E miembronan mester tin un konosementu amplio di inisiativa sosial, preferiblemente ku un enfoke riba proyektonan relatá na e pasado di sklabbitut. Entre otro, esaki por ta relashoná ku proyektonan edukativo, kultural, i sosial.
- *Ekspertisio riba Tereno di Trabou Sosial*: Un trasfondo riba tereno di trabou sosial, manera eksperensia ku trabou sosial, estudio kultural, historia, òf den áreanan relashoná ta deseabel. Esaki ta yuda pa komprondé e konteksto mas amplio di inisiativa sosial i nan impakto.
- *Konosementu di e Komunitat di Desendiente i afinidat òf konekshon ku e parti karibense di e Reino*. Esaki ta enserá kompreshon di nan historia, kultura, idioma (manera ingles i papiamentu), retonan i nesesidatnan.
- *Independensia i Imparsialidat*: Miembronan mester ta independiente i imparsial, di moda ku nan por evaluá solisitutnan ku a entregá di un manera ophetivo, sin konflikto di interes. Teniendo kuenta ku e eskala chikitu di e islanan, lo hasi posibel pa e miembronan di Komishon di konseho ta envolví den entrega di solisitut di e diferente islanan/ paisnan den e parti karibense di e Reino. Si e situashon aki surgi, ta ferwagt ku e miembro konserní di Komishon di konseho ku e no ta saka un konseho tokante e solisitut (ku parsialmente ta di e mes).
- *Diversidat i Representashon*: Komposishon di e Komishon di konseho mester ta diverso, pa garantisá un eskala amplio di perspektiva i eksperensia, inkluso representashon di diferente trasfondo kultural, edat, i disiplina. Tur seis isla mester tin sufisiente representashon den esaki.
- *Envolvimentu ku Derecho Humano i Hustisia Sosial*: Envolvimentu ku derecho humano i hustisia sosial ta un bentaha, espesialmente relashoná ku e pasado di sklabbitut.

3. Kuadro legal

E areglo aki ta redaktá a base di Artíkulo 2, insiso dos, di e Kaderwet (Lei Marko). Supsidio ku asigná lo asigná a base di e areglo aki i sigun e reglanan di e desishon aki.

Sosten di estado

Durante redakshon di e areglo di supsidio aki a tene kuenta ku lei i regulashon di UO tokante sosten di estado. Lei di UO tin aplikashon limitá riba e partinan karibense di e Reino. E reglanan tokante sosten di estado no ta aplikabel pa empresanan establese den e partinan karibense di e Reino, pasobra e islanan aki no ta parti di e merkado interno di UO. Den e areglo di supsidio a garantisá ku aktividatnan subsidiá solamente por tuma lugá den e partinan karibense di e Reino. P'esei no mester tene kuenta ku e reglanan tokante apoyo di estado, tampoko.

E reglanan di apoyo di estado sí ta aplikabel riba empresa ku ta ekonómikamente aktivo na Hulanda Oropeo. Si suministrá un supsidio na un empresa ku ta aktivo tantu na Hulanda Oropeo komo den e partinan karibense di e Reino, mester tene kontabilidadat separá. Na un banda, mester tene kontabilidadat separá pa aktividatnan ku ta tuma lugá den e parti karibense, i na otro banda pa aktividatnan den e parti oropeo. Lo suministrá fondonan for di e areglo di supsidio aki solamente pa aktividatnan den e parti karibense di e Reino.

E reglanan aki tambe ta konta ora suministrá supsidio na un empresa ku ta aktivo tantu na Sint Maarten komo na e parti franses, Saint Martin. Saint Martin sí ta parti di e merkado interno di UO, unda e reglanan pa apoyo di estado ta aplikabel.

4. Konsekuensianan finansiero i gastunan atministrativo

Na tur, tin € 33.333.333,33 disponibel pa e areglo supsidio iniciativa sosial Pasado di Sklabitut transatlántiko pa e periodo di promé di yüli 2024 te promé di yüli 2029. Pa kada aña ekonómiko tin un montante mínimo di €555.555,50 i un montante máksimo di €1.111.111,11 disponibel pa kada isla. Ora no hasi uso di henter e montante máksimo den un aña finansiero, lo transferí sobrá di e montante pa e siguiente aña ekonómiko.

Pago i forskòt

- Riba e solisitutnan bou di parti 1, e voucher di profeshonalisashon, forskòt manera deskribí den Artíkulo 23, insiso un, di e Kaderbesluit BZK-subsidies (Desishon marko supsidionan BZK) ta aplikabel. Aki ta deskribí ku pago di e montante di supsidio establese ta sosodé un biaha so.
- Pa supsidio di €10.000,- te €25.000,- a base di Artíkulo 5, insiso dos, Artíkulo 23, insiso dos, di e Kaderbesluit BZK-subsidies (Desishon marko supsidionan BZK) ta aplikabel. Aki ta deskribí ku lo paga un forskòt di 100% ora duna un disposishon pa asignashon di supsidio.
- Pa e sobrá supsidionan, di €25.000,- te ku €500.000,-, lo inkluí e forma di forskòt den e disposishon pa asignashon di supsidio. E punto di salida aki ta un forskòt standard di 80%.

Responsabilisashon i stipulashon di supsidio

Pa garantisá un uso transparente i responsabel di fondonan di supsidio, a stipulá instrukshonnan kla pa responsabilisashon den e areglo. E reglanan general tokante responsabilisashon i stipulashon di supsidio ta stipulá den Artíkulo 24 di e Kaderbesluit (Desishon marko). Lo entregá e solisitut pa fiha e supsidio hasiendo uso di un formulario ku a hasi disponibel p'esei. E solisitut ta bai kompañá pa un relato final i, si esaki ta aplikabel, un deklarashon di kontrol. Den un anekso lo splika e espektativanan; esaki ta dependé di e montante di supsidio ku a asigná.

Relato final despues di finalisashon aktividatnan:

Tur ku a risibí un supsidio a base di Artíkulo 5, insiso dos, mester entregá un relato final despues di finalisashon di e aktividatnan. E relato mester kontené un refleho di e resultadonan ku a logra, rekursonan ku a gasta, i e grado te kon leu e proyekto a kontribuí na e metanan stipulá konforme e kondishonnan di supsidio. Pa e solisitut pa vouchernan di profeshonalisashon ta konta un stipulashon direkto di e supsidio; no mester tin un relato final pa esaki. E Minister lo suministrá instrukshonnan mas aleu relashoná ku entrega i contenido di e relato final den e disposishon di supsidio.

Responsabilisashon ekstenso pa supsidionan riba €125.000:

Tur ku a risibí un supsidio a base di Artíkulo 5, insiso dos, ku un montante mas haltu ku €125.000, despues di finalisashon di e proyekto subsidiá mester entregá un responsabilisashon ekstenso. E responsabilisashon aki ta enserá e informe final di e proyekto, kompañá pa un deklarashon di kontrol di accountant konforme Artíkulo 4:78 di e Algemene wet bestuursrecht (Lei general derecho

administrativo). E Minister lo proveé instrukshonnan mas aleu relashoná ku entrega i kontenido di e relato final den e disposishon di supsidio.

*Gastunan administrativo*⁶

E gastunan administrativo total (solisitut i responsabilisashon) ta bini⁷. A basa esaki riba un gastu di **ora ku un tarifa promedio pa ora di €***,-

5. Realisashon

E puntonan di salida di e areglo di supsidio pa e partinan karibense di e Reino ta surgi for di e rapòrt 'Ketenen van het verleden' (Kadenanan di Pasado) – i partikularmente su aneksonan ku kontribushonnan for di e islanan – e reakshon di gabinete di 19 di desèmber 2022 riba e rapòrt di e Grupo di diálogo Pasado di Sklabitut i e karta di progreso di 23 di yùni 2023 'Brief vervolgtraject excuses slavernijverleden' (Karta trayekto kontinuashon diskulpanan pasado di sklabitut). Tambe tabatin diferente kombersashonnan intensivo i konstruktivo ku e komunidadnan i representantenan di e islanan/ paisnan den e partinan karibense di e Reino durante 2022 i 2023 pa haña input, manera tambe un Catshuissessie karibense na òktober 2023. Den e areglo aki tambe ta tene kuenta ku e *CARICOM Ten Point Plan for Reparatory Justice (Plan di Dies Punto di CARICOM pa Rekuperashon di Hustisia)*.⁸

Ademas, a tuma lugá un konsulta via internet pa e término mínimo standard di 30 dia, di 1 te ku 31 di mart,⁹ i a evaluá e areglo aki mediante enkuentronan pa feedback ku representantenan ofisial i representashon for di e komiténan/ plataformanan na e paisnan/ islanan.

6. Entrada na vigor

Lo publiká e areglo aki dia promé di yùni 2024 den e Staatscourant (boletin di legislashon nashonal di Hulanda) i e Staatsbladen (boletinnan di legislashon nashonal) di Aruba, Kòrsou i Sint Maarten, i e ta drenta na vigor dia promé di yùli 2024 00:00 or di ora hulandes oropeo. Pasobra aki ta trata di un areglo for di Hulanda Oropéo, e Fecha di publikashon den e Staatscourant ta loke ta konta.

Ku esaki a desviá di e término mínimo pa introdukshon. Esaki ta deseabel pasobra ta importante ku por pidi i asigná e supsidio riba término kòrtiku. Lo komuniká eksistencia di e areglo di supsidio i kontenido di e areglo for di tempran na e komunidad di desendiente mediante un Catshuissessie na fin di yanüari 2024, i mediante e konsulta di internet. Ku esaki lo evitá desbentaha públiko indeseabel konsiderabel. Lo hasi eksepshon pa e e término mínimo pa introdukshon a base di instrukshon 4.17, insiso sinku, bou di a, di e Aanwijzingen voor de regelgeving (Instrukshonnan pa Regulashon).

E areglo di supsidio ta kaduká entrante promé di yùli 2029. Pues, despues di esaki lo no sigui mas periodo di solisitut. Despues di kadukashon di e areglo, sí tin tempu ainda pa ehekushon di e aktividadnan, pasobra eseinan por tin un plaso di vigensia máksimo di 6 aña.

II. Splikashon artíkulo pa artíkulo

Artíkulo 1. Definishonnan

Den kuadro di e areglo aki, lo hasi uso di e definishonnan akibou pa e konseptonan 'desendiente', 'komunidad', 'pasado di sklabitut transatlántiko' i 'organisashon grassroots':

⁶ PM aanvulling regeldruktoets ATR

⁷ P.M. Adviesaanvraag ATR (eind maart 2024 beschikbaar).

⁸ CARICOM TEN POINT PLAN FOR REPARATORY JUSTICE [CARICOM Ten-Point Plan for Reparatory Justice.pdf](#) ([ohchr.org](#))

⁹ P.M. updaten met reactie internetconsultatie.

Desendiente di hende sklabisá

Desendiente di hende sklabisá ta referí na e desendiente di hende ku den pasado tabata sklabisá. Den e konteksto di e pasado di sklabilitut transatlántiko, e término aki ta referí na e generashonnan ku a nase di e generashonnan di hende afrikano, nativo for di e diferente partinan di Nortamérica i Suramérica i na Marron (desendiente di katibu ku a hui i a bai biba den interior komo tribu), ku for di mas o ménos 1528 te 1863/1873 tabata sklabisá. E término aki tambe ta enfatisá e kontinuidat históriko di e in hustisia ku sklabilitut a kousa i e efektonan pa término largu riba e komunidatnan envolví. Ademas, e ta rekonosé importansia di kompreshon di e herensia i e impakto di sklabilitut i di atendé ku kuestionnan presente ku a surgi for di e historia aki, inkluso desigualdat ekonómiko i sosial, diskriminashon, i trouma di un generashon pa otro.

Komunidat

Den kuadro di e pasado di sklabilitut, komunidat ta referí na e grupo di hende ku histórikamente mirá ta direktamente afektá pa sklabilitut i e práktikanan relashoná ku esei. Ta trata di desendiente di hende sklabisá i e grupo di hende ku ken, a base di karakteristikanan i interesnan komun, nan tin un espíritu di solidaridat òf un laso interpersonal.

Pasado di sklabilitut transatlántiko

E era históriko (respektivamente for di kuminsamentu di siglo 16 te fin di siglo 19) den kua a sekuestrá, trafiká i sklabisá miónes di hende, prinsipalmente for di Afrika, ken despues a obligá di traha riba plantashi, den mina i den otro sektor, prinsipalmente den e diferente partinan di Merka (Nortamérica i Suramérica), Afrika i partinan di Oropa. E práktika hororoso aki di e trafikashon di katibu a tuma lugá entre e siglonan 15 i 19, i tabata un proseso sistemátiko di trafikashon di hende ku tabatin un impakto grandi riba e individuonan envolví i nan desendentenan. Alkansa di e fondo di kua e areglo di supsidio inisiativa sosial ta un parti, ta e Pasado di sklabilitut transatlántiko; den e kaso aki pa partidonan privá for di henter e Reino i pa paisnan ku tin un relashon ku e pasado kolonial hulandes, manera ta e kaso ku Sürnam.

Organisashon grassroots

Organisashon grassroots den kuadro di pasado di sklabilitut ta referí na organisashon, instituto kultural òf instituto sosial sin fin di lukro (fundashon òf sosiedat), ku a lanta na nivel lokal for di e komunidat di desendiente di hende sklabisá, i ta organisá pa atendé kuestionnan spesífiko relashoná ku e pasado di sklabilitut na fabor di desendiente di hende sklabisá. Generalmente, e organisashonnan aki ta hasi esfuerso pa konsientisashon, hustisia, pa empoderá i pa kambio positivo duradero/ mehorashon den bida di desendiente.

Artíkulo 2. Ophetivo di supsidio

E ophetivonan di e areglo di supsidio aki ta aliniá ku e ophetivonan manera mensioná den e reakshon di gabinete di 19 di desèmber 2022.¹⁰

Artíkulo 4. Periodo di solisitut

E plafònnan di supsidio ku a stipulá den Artíkulo 4, insiso dos, ta konta pa e promé aña ekonómiko ku e areglo ta kore. Ora no yega e plafòn aki den e promé periodo di solisitut, e sobrá rekursionan ta skùif pa e di dos periodo di solisitut. E plafònnan di supsidio ta stipulá a base di toma di desishon di representantenan di Aruba, Boneiru, Kòrsou, Saba, Sint Eustatius i Sint Maarten mediante enkuentronan di feedback. Aki a disidí pa repartí e suma total di e areglo di supsidio di forma ekivalente entre tur seis isla. Esaki ta nifiká lo siguiente:

- €33.333.333,33 / seis isla ta €5.555.555,55 pa kada isla pa e plaso di vigensia total di e areglo.
- Debí na e plaso di vigensia di sinku aña di e areglo di supsidio, esaki ta nifiká €5.555.555,55 / sinku aña ekonómiko pa kada isla. Esaki ta nifiká un plafòn di supsidio di €1.111.111,11 pa kada isla pa kada aña ekonómiko.

¹⁰ Tweede Kamer, aña di reunion 2022-2023, 36 284, nr. 1 <https://open.overheid.nl/documenten/ronl-a6b18a9d980649083437fdc086c48125c608be46/pdf>

- 2024 konosé ún periodo di solisitut; pa 2025 a proveé dos periodo di solisitut. Ku esei, e plañonnan di supsidio pa kada isla pa e periodo di solisitut inkluí den e areglo aki ta €555.555,55 pa kada isla pa kada periodo di solisitut.

Ora no yega e plañon di supsidio di un di e kategorianan manera mensioná den Artíkulo 4, insiso dos, na fin di e di dos periodo di solisitut, por usa e rekursanan pa solisitutnan kompleto i entregá na tempu ku a nenga dor di un lugá muchu abou den e sekuensia. Esaki ta nifiká por ehèmpel ku ora solisitante no sali ganadó di sorteo pa e voucher di profeshonalisashon, ainda nan por bini na remarke pa esaki ora resultá ku no a yega e plañon di supsidio pa e inisiativanan pa fortalés e komunidad. E asignashon aki ta tuma lugá a base di sekuensia eksistente kaba. Pues, solisitantenan ku ta mas haltu riba e lista lo ta esnan promé na burt.

A skohe pa dos periodo di solisitut sigui na 2024, pa ofresé solisitante ku no logra kaba un solisitut den e promé periodo di solisitut un di dos opshon ku tambe ainda ta kai den e aña 2024.

Ku esei, e periodonan di solisitut manera inkluí den Artíkulo 4 di e areglo aki ta lo siguiente:

Aña ekonómiko	Number di periodo	Periodo di solisitut
2024	1	1 di yùli te 1 di sèptèmber 2024
2025	2	1 di novèmber 2024 te 1 di aprel 2025
2025	3	1 di mei te 1 di sèptèmber 2025

A skohe pa ainda no stipulá e sobrá periodonan den e areglo, di moda ku e planifikashon ta sigui fleksibel i por hasi ahustenan durante transkurso di e areglo. Asina, por apliká e lèsnan ku a siña relashoná ku planifikashon di e promé periodonan den planifikashon di e siguiente periodonan. Lo anunsia fechanan di e periodo di solisitut nobo sufisientemente adelantá di forma transparente.

Artíkulo 6. Solisitantenan

No ta ekskluí e posibilidat komo organisashon pa entregá diferente solisitut pa diferente proyekto. Solamente pa e voucher di profeshonalisashon ta konta ku por pidi esaki solamente ún biaha denter di mesun aña kalendario i na tur solamente por pidié maksimalmente dos biaha.

E areglo aki ta destiná pa solisitantenan registrá den e partinan karibense di Hulanda.

Artíkulo 7. Altura di e supsidio

Pa solisitut ku ta kai bou di Artíkulo 4 insiso un i dos, ta konta un repartishon den e alturanan di supsidio manera mensioná den e parti general di e splikashon aki. Aki ta konta ku lo asigná supsidionan te €25.000,- a base di sorteo, i e lo duna montantenan mas haltu ku esei un rango a base di e konseho di un Komishon.

Artíkulo 8. Solisitut pa supsidio

A hasi e formulario elektróniko disponibel riba e website di PM

Artíkulo 9. E sekuensia di e solisitut

Pa supsidionan mas abou ku €25.000 lo determiná e sekuensia di tur solisitut kompleto entregá na ora dor di un sorteo. E sorteo ta tuma lugá den presensia di un notario i por lo ménos 2 opservadó. Lo fiha e sorteo por eskrito. Solisitut ku e rango di mas haltu ta bini na remarke pa supsidio promé. Si no surpasá e plañon di supsidio ku tur solisitut kompleto entregá na tempu, lo asigná e solisitutnan sin ku un sorteo ta tuma lugá.

Pa supsidionan di €25.000 i maksimalmente €500.000, un Komishon ta emití un konseho por eskrito tokante e sekuensia. Lo kompartí e konseho aki por eskrito ku e Sekretario di Estado di Asuntunan Interno i Relashon den Reino. Sekretario di Estado ta tuma e desishon final, teniendo kuenta ku e konseho.

Artíkulo 11. Kriterionan di evaluashon

E Komishon di konseho ta evaluá e solisitut riba e siguiente aspektonan:

- a. Solisitutan mester mostra di manera kla kon e aktivitat ta aliniá ku e ophetivonan aspirá, manera promoshon di konosementu i konsientisashon tokante e pasado di sklabilitut, kombati konsekuensianan di e impakto di e pasado di sklabilitut den presente, prosesamentu di e pasado di sklabilitut, i rekonosementu i konmemorashon di e pasado di sklabilitut.
- b. Lo evaluá solisitut pa supsidio sigun e probabilidadat ku berdaderamente lo logra e metanan fihá. Solisitante mester demostrá di forma konvinsente ku nan proyekto lo hiba na resultado konkreto i lo tin un impakto konsiderabel.
- c. E evaluashon ta enserá atenshon spesífiko pa e grado te kon leu e proyekto ta benefisiá desendiente di hende sklabisá. Esaki por ta relashoná ku iniciativa/programa enfoká riba e grupo di enfoke aki i strategianan pa oumentá envolvimentu di e komunidadnan aki.
- d. Lo evaluá efisiensia di e aktivitat en relashon ku e gastunan. Solisitantenan mester demostrá ku e gastunan proponé ta kuadra ku e alkanse aspirá i e impakto di e aktivitat. Un análisis di e gastunan relashoná ku e alkanse den e solisitut por yuda ku esaki (un P*Q fundamentá den lokual a duna kompreshon tokante e diferente aktivitatnan i e gastunan kalkulá pa esaki.

Den e sekuensia di solisitut pa supsidio lo duna preferensia na proyektonan i aktivitatnan unda ta buska pa traha huntu i aliniá ku organisashon grassroots. Lo evaluá promoshon di kolaborashon ku e organisashonnan aki komo positivo, debí na nan papel importante na nivel lokal i nan envolvimentu direkto ku e komunidadnan influensia pa e pasado di sklabilitut.

Artíkulo 13. Forma di suministrá supsidio

E forma di suministrá supsidio den e areglo aki ta sigui e reglanan pa suministroo di supsidio manera nan ta skibi den Artíkulo 16, 17 i 18 di e Kaderbesluit BZK-subsidies (Desishon marko supsidionan BZK).

Artíkulo 16 ta tokante supsidio mas abou ku € 25.000. Karakterístiko pa eseinan ta ku lo suministrá e supsidionan aki den forma di un montante fiho. P'esei lo determiná e vouchernan di profeshonalisashon mesora. Serka supsidio pa iniciativa sosial ku ta mas abou ku € 25.000 lo duna un forskòt di 100% di e gastunan, pero lo determiná e supsidio ofisialmente na un momentu indiká den e disposishon pa asigná supsidio. Den e kaso aki, e risibidó di supsidio sí tin e obligashon di mèldu na tempu na momentu ku ta probabel ku e aktivitatnan no por tuma lugá na tempu òf no kompletamente, òf ku no por kumpli ku e obligashonnan di e areglo.

Artíkulo 17 ta tokante supsidionan entre € 25.000 i € 125.000. E diferensia entre supsidionan mas abou ku € 25.000 i supsidionan di €125.000 òf mas ta ku den e kaso aki komo standard mester demostrá ku a ehersé e aktivitatnan pa lokual a asigná e supsidio, i ku a kumpli ku e obligashonnan mará na e supsidio.

Artíkulo 18 ta tokante supsidio di € 125.000 òf mas. Aki ta konta, meskos ku serka Artíkulo 16 i 17, e obligashon pa mèldu esaki ora ta probabel ku e aktivitatnan no por tuma lugá. Pues, únikamente pa e voucher di profeshonalisashon e obligashon aki no ta konta.

Informe di progreso

Pa supsidio di €25.000,- òf mas unda e aktivitatnan ta dura mas ku un aña, mester manda un informe di progreso un biaha pa aña. E informe aki ta mostra kiko ta e progreso di e aktivitatnan. Por haña e obligashon aki bèk den Artíkulo 19 di e Kaderbesluit BZK-subsidies (Desishon marko supsidionan BZK).

Gastunan eligibel pa supsidio

Solamente e gastunan ku ta direktamente relashoná ku ehekushon di e aktivitatnan. Tambe, e gastunan mester ta rasonabel pa ehekushon di e aktivitat. P'esei, mester supstansiá e solisitut di supsidio ku un spesifikashon di e gastunan ku por atribuí na e aktivitat. Despues, ora di stipulashon di e supsidio, e Minister ta evaluá si ta probabel ku a hasi e gastunan aki, si nan ta direktamente relashoná ku ehekushon di e aktivitatnan pa lokual a risibí e supsidio, i si ta trata di gastunan rasonabel. E proseso aki ta surgi for di Artíkulo 6 di e Kaderbesluit BZK-subsidies. (Desishon marko supsidionan BZK)

Herstelbetalingen (pago financiero en konekshon ku daño okashoná pa sklabilitut), kompensashon òf indemnishon pa e pasado di sklabilitut no ta bini na remarke pa supsidio. Ku e areglo aki, e gabinete

a skohe konsientemente pa un gesto moral i étiko relashoná ku e diskulpanan pa e pasado di sklabilitut. Na mes momentu, e gabinete ta sigui aktivamente envolví ku iniciativa ku ta promové e lucha kontra diskriminashon i rasismo.

Artíkulo 14. Obligashonnan resibidó di supsidio

Fuera di e obligashonnan mensioná den Artíkulo 16, a suma obligashonnan pa e risibidó di supsidio den Artíkulo 21 di e Kaderbesluit BZK-subsidies (Desishon marko supsidionan BZK). Sigun e Kaderbesluit (Desishon marko), e risibidó di supsidio tin e obligashon pa:

- a. ehekutá e aktivitat di akuerdo ku e deskripshon di e aktivitat ei den e disposishon tokante suministroo di supsidio, òf, ora duna un disposishon pa fiha supsidio direktamente, konforme e deskripshon di e aktivitat ei den e determinashon di supsidio;
- b. pa kumpli ku e obligashonnan ku e Minister a mara na e supsidio;
- c. riba petishon di e Minister, duna tur kooperashon pa publikashon di e datonan i e resultadonan di e aktivitat supsidiá, a ménos ku no por eksigí publikashon di esei rasonablemente;
- d. riba petishon di e Minister, duna tur kooperashon na un investigashon di evaluashon instituí dor di e Minister tokante aplikashon i efekto di e desishon aki, ku e Minister tin mester di dje rasonablemente den ehekushon di e investigashon di evaluashon ei;
- e. si a forma un reserva pa gastunan, manehá esaki di forma mas seif posibel;
- f. notifiká Minister inmediateamente por eskrito tokante entrega na korte di un petishon pa deklará e areglo di saneamentu di debe pa persona natural aplikabel riba dje, pa dun'e suspenshon di pago, òf pa deklar'é bankarota;
- g. pa hiba un atministrashon separá pa e aktivitatnan pa lokual ta risibí supsidio i pa e sobrá aktivitatnan;
- h. Pa warda atministrashon hibá den kuadro di suministroo di e supsidio te sinku aña despues di e fecha riba e disposishon pa determinashon di supsidio òf, si por papia di sosten di estado, durante un otro término indiká den un areglo òf disposishon ministerial;
- i. riba petishon di e Minister, presentá informashon mas aleu na favor di responsabilisashon mas aleu na Komishon Oropeo, a base di e Artíkulo 106, insiso dos i tres, 107, i 108 di e Verdrag betreffende de Werking van de Europese Unie (Tratado tokante funshonamentu di Union Oropeo) òf un di e sistemanan di apoyo oropeo.

E Sekretario di Estado di Asuntunan Interno i Relashon den Reino